

Date – 28/06/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

- India sorkar leh MNF ten inremna an ziah ni, Remna Ni lawmna Mizo Zirlai Pawl huaihawta Aizawla neih chu Chief Minister Pu Lalduhoman a hmanpui.
- Larsap Dr Hari Babu Kambhampati an zirna chu hnam inpumkhat tir tu leh hnam lungphum ani a ti .
- Lok Sabha rorel inkhawm chu opposition ten NEET Exam buaina chungchang sawi an ngiat vangin rorel theiloin vawiin atan tihtawp a ni.
- Jharkhand High Court chuan ram acre 8.36 dankalha neih thubuaia sum chhehrelh thubuai nei mek Chief Minister hlui Hemant Soren chu vawiin khan bail a phalsak.

<><><>

REMNA NI

India sorkar leh MNF ten inremna an ziah ni, Remna Ni chu Pathianni-a a tlak avangin vawiin khan Aizawlah hman a ni a, Aizawl Falkland-a Mizo Zirlai Pawl huaihawta neih chu Chief Minister Pu Lalduhoman a hmanpui.

Chief Minister chuan thusawiin Mizo zingah mi ngaihsan 3 a nei a, chung mite chu Pu Laldenga, Pu Malsawma Colney leh Pu Ch Chhunga te an ni a ti a, Pu Laldenga chu mi huaisen thinlung lama huaisen a ni a ti a, Pu Malsawma Colney chu Mizo Nationalist diktak tia sawiin a ni hi a tawp thlenga a nih nih ni ngam a ni a ti a, Chief Minister hmasa ber Pu Ch Chhunga chu Mizoram in remna a neih theihna tura theihtawpa hma la tu a ni a ti.

Zirlai Pawl tel lovin Remna Ni a neih theih loh tih chu a ngaihdan a nih thu Pu Lalduhoma chuan a sawi a, zirlai pawlin na takin nawr lo se remna neih kha a rinawm loh a, zirlai te chu sul sutu an ni a, kohhran hrulaitu te chuan remna an zawng a, theihtawp an chhuah bawk a ni a ti.

Pu Lalduhoma chuan, India leh Mizoram inremna ah Memorandum of Settlement ah MNF in demand 17 an nei a, chung zinga 3 chu sorkar laipuiin a pawm ve theih loh a awm a ti a, chungte chu , CADC thiah a ni a, 2-na chu hnamdang danna dan, Inner Line Regulation, tuna ILP pek theihna hi tihdanglam emaw tih tawp anih dawnin state remtihna neih ngei a ngai tih a ni a, chubakah chuan Greater Mizoram tih chu a ni a, Mizoram chhehvela Zohnahtlak awmna te chenhona tur siam a ni a, heng hi sorkar laipui lam chuan MNF rawtna angin an pawmsak lo a ni a ti.

MZP huaihawta Remna Ni lawmnaah hian remna a awm theih nan mi pawimawhte hnenah chawimawina hlan thin an ni a, kumin hian Pu JH Rothuama, Pu P. Lalupa, Pu Lalthanzauva leh Pu Ngurchhina te hnenah chawimawina hlan niin, anni hian Remna a awm theih nan kum 1981 khan MLA nihna an bansan a ni.

Chief Minister Pu Lalduhoma chuan anni hi Remna atana MLA an nihna hlu tak kian hmasa ber an ni a ti.

Remna Ni pual hian Serchhip ah Lalro Digital Studio ah hun hman a ni a, Pu Kawlthuama -Sub hqrs YMA president leh Pi Lianthangi Sub hqrs MHIP President te chuan Remna ni pualin puanzar an pawt parh a ni.

Pu Kawlthuama chuan Remna ni chu mizote tan a hlu in, ni chhinchhiah tlak leh pawimawh tak a nih thu a sawi a. Remna thuthlung in a ken tel Sakhua a lo him a a lo than len zel na tur leh Sakhua dang in Mizote a chim ral loh nan Kristianna vawng nung reng turin kalkhawmte a chah a ni.

MZP Headquarters Mamit pawhin BRC Hallah Remna ni an hmang a. Mamit District Bawrhsap Pu V.L. Remliana chuan a hmanpui.

He hunah hian Omega Vanlalruata Asst. Professor, Govt. Mamit College chuan zirlai kalkhawmte hnenah Rambuai chanchin leh a chhehvel zirtirna a pe ani.

<><><>

LADC VC

Lai Autonomous District Council huamchhunga village council 98-a Inthlanpui vote thlak nimin buatsaihah nimin khan tluang taka vote thlak niin, vote chhiar nghal a ni a,

ZPM-in seat 246 lain, VC 38-ah an chang a; MNF chuan seat 192 lain, VC 25-ah hnehna an chang a; INC chuan seat 102 lain, VC 12-ah hnehna an chang a; BJP chuan seat 7 lain, VC siamna an nei lo va; Independent candidate-te'n seat 43 lain, VC khata seat zatve aia tam lakna VC 1 an nei a; party mala VC din thei awm lohna VC 22 a awm bawk.

LADC-a VC 99 zingah Hmawngbuchhuah VC-ah chuan inthlan chuh tura endikna paltlang zo an awm loh avangin inthlan buatsaih a ni lo va. VC 98-ah Inthlanpui hi kalpui niin, VC 98-ah hian a duh apiangin an chuh theih general seat 492 leh hmeichhe tana hauh bik reserved seat 98, a zavaiin seat 590 a awm a. Inthlan chuhtu candidate zawng zawng hi mi 1,511 niin, Bharatiya Janata Party (BJP) candidate 24; Indian National Congress (INC) candidate 300; Mizo National Front (MNF) candidate 438; Zoram People's Movement (ZPM) candidate 549 leh Independent candidate 200 an awm a ni.

VC 97-a vote awm zawng zawng 55,342 atangin polling station-ah vote 43,211 a tla a. Postal ballot-a vote tla 288 nena belh khawmin vote hi zaa 78.60 a tla a ni.

<><><>

GOVERNOR

Larsap Dr Hari Babu Kambhampati an zirna chu hnam inpumkhat tir tu leh hnam lungphum ani a ti a, retheihna ata mi khaichhuaktu leh hmasawna kawng kawhhuhtu a ni a ti.

He thu hi vawiina 2 Assam Rifles Zokhawsang Complex-ah NIEDO Second Batch coaching a hawna ah sawiin Governor chuan zirna leh hmasawna chu thil kal kawp tlat a ni a ti a, zirlai tam tak hmasawna lama ke pen duh hmuh tur awm thin chu lawmawm a tih thu a sawi bawk.

Vawiina hun hman hi JEE, NEET leh exam dangte entrance exam-na atana inbuatsaihna open house mentoring camp niin Assam Rifles, National Integrity & Educational Development Organisation (NIEDO), & Axis Bank te thawhhona a ni a, Larsap chuan an hmalakna chu Mizoram thalaite tan a hluin a tangkai tih a sawi a. Axis Bank, NIEDO leh Assam Rifles ten Mizo te hmakhua ngaia, zirlai zinga chhungkaw khawsak harsa zawk te tana India rama zirna in tha filawr luh theihna kawngka an hawng chu lawmawm a tih thu a sawi bawk.

Nikum September 27 khan Governor Dr Hari Babu Kambhampati hriatpuiin a hmaah, HQ 23 Sector, Assam Rifles, NIEDO, leh Axis Bank te chuan thawhhona thuthlung an lo ziak tawh a. He thawhhona hnuaiia project "Sentinel Centre" hnuaiia hian ei leh in leh awmna a thlawn veka tum sakin chhungkaw harsa zawk atanga zirlai pawl 12 pass te tan JEE, NEET leh a tlukpui Entrance Exam hmachhawn tura Coaching buatsaih a ni. He project atan hian Axis Bank chuan CSR hnuaiia kum 4 chhung atan cheng vbch 3 nuai 9 a sanction a ni.

Nikum khan entrance exam-ah hian Mizoram District hrang hrang atangin zirlai 186 an inlan a. Final stage-ah zirlai 30 thlan chhuah an ni. Training hi January thla atang khan tan a ni a, thla li chhung awh a ni a. Heng zirlai 30 zingah hian JEE exam-ah pakhatin hlawhtlinna a chang a, NEET exam-ah mi 20 an hlawhtling bawk. Kumin hian NIEDO second batch entrance exam-ah hian zirlai 436 an inlan leh a. Chung zinga zirlai 144 chu interview atan thlan an ni a, a tawpah zirlai 30 thlan chhuah an ni.

Vawiina hun hman zawh hian Governor chuan batch hnuhnung ber atanga candidate hlawhtlingte hnenah lawmpuiina pein Coaching Centre a endik a, zirlaite leh zirtitute

a kawm chhonzawm nghal bawk. Vawiin a Coaching hawna program-ah hian Dr Rohit Srivastava, Director NIEDO leh Axis Bank aiawh te pawh an tel a ni. (CORR)



EDUCATION MINISTER

Mizoram Board of School Education (MBSE) buatsaih Pawl 11 Zirlaibu 4, Physics, Chemistry, Biology leh Mathematics, Mizo tawnga ziak chu vawiin khan School Education Minister Dr. Vanlalhlana'n a tlangzarh a, Mizoram chu ramchhunga tawng 2 a zirlaibu, bilingual textbook hmang hmasa ber State a ni.

Dr. Vanlalhlana chuan pawl 11 zirlaite tana mahni tawng ngeia Science leh Mathematics subject zir theihna zirlaibu tha tak khawrpuma tlangzarh a ni ta chu lawmawm tiin, a puitlin theih nana ngaihtuahna sengtute fakawm a tih thu a sawi a. NEP 2020 inkaihhraina duante chu a theihna apiangah a tam thei ang ber kalpui tum a ni tih sawiin, sawkarin thawhhona a ngaihpawimawh avangin zirna lam buaipuitute inkarah inpawhtlang taka thawhhona chhawmnun zel a tul dawn a, hemi atan hian tawnhriat ngah zawk zirtirtu leh education department hotute in pawimawh hle dawn a ni, a ti bawk.

School Education Minister chuan tawng pahnih, mahni tawng leh English hmanga zirna kalpui thin te'n thiamna tak tak neiin thil tih an awlsam phah thu sawiin, tuna bilingual textbook kalpui hian nakin lawkah rah tha a chhuah ngei a beisei a ni, a ti a. Thangtharte tana rohlu tak tur pawl 11 Science leh Mathematics zirlaibu Mizo tawnga buatsaih chuan zirna kawnga bung thar kaina piah lamah hmasawna a thlen ngei a beisei thu a sawi bawk.

National Education Policy (NEP) 2020 in tawng chi hniha zirna kalpui, a bik takin Mathematics leh Science subject-ahte a ngaihpawimawh avangin MBSE chuan tawng chi hnih (Mizo leh English version) zirlaibu 'bilingual textbooks' siam turin kum 2022 atangin hma a la tan a. Academic session 2023-2024 ah khan Mizoram pumah Science leh Mathematics bikah pawl 9 leh pawl 10-ahte bilingual version textbooks hman tan a ni a, MBSE hnuaia zirlaite chu India rama bilingual textbooks hmang hmasa ber an ni. Tunah hian pawl 12 Science leh Mathematics subject-te Mizo tawnga buatsaih turin buaipui mek a ni bawk.

Tuna hman mek Science leh Mathematics zirlaibu High School bik tana siam bilingual textbooks-ah hian MBSE chu copyright holder a ni a, English leh Mizo version-te chu lehkhabu pakhata dah kawp a ni a. Higher Secondary School tana siam bilingual textbook, vawiina tlangzarh takte hi a nih ang anga lehlin ni lovin MBSE syllabus mila ziah a ni.

(DIPR)



LOK SABHA

Lok Sabha rorel inkhawm chu opposition ten NEET Exam buaina chungchang sawi an ngiat vangin rorel theiloin vawiin atan tihtawp a ni. Vawiin Lok Sabha thutkhawmah hian Congress Member ten Unin Education Minister Dharmendra Pradhan chu bang turin an nawr a. Anni bakah hian DMK, TMC, Samajwadi Party leh eptu MP dangte chu house laiah chhuak khawmin an au bengchheng hle a. Speaker Om Birla chuan he buaina zirchiang tur Committee din anih thu sawiin President Motion of Thanks sawiho hunah an tarlang thei reng tih a sawi a. NEET buaina chungchanga Opposition memberte thil phut chu a pawm sak duh lo a. Rorel thei lova house a awm avangin vawiin atan inkhawm tihtawp a ni ta a ni.

<><><>

JHARKHAND CM BAIL

Jharkhand High Court chuan ram acre 8.36 dankalha neih thubuaia sum chhehrelh thubuai nei mek Chief Minister hlui Hemant Soren chu vawiin khan bail a phalsak. Pu Soren-a hi Ranchi-a Birsa Munda Central Jail ah sum chhehrelh thubuai avang hian tan tir mek a ni a. Kumin January ni 31 khan Enforcment Directorate (ED) ten an man a ni.

<><><>

IRAN PRESIDENT ELECTION

Iran President inthlan chu vawiin khan buatsaih a ni a. President inthlan vawi 14 na hi nakum 2025 a neih chauh tur ni mahse thla hmasaa helicopter chesualah President Ebrahim Raisi a thih avangin sawn hma a ni a. Vote thlakna tur hi polling station 59000 chuang siam niin state 95 ah vote thlak a ni dawn a. Mi maktaduai 61 chuangin vote an nei a ni. Tun tum inthlanah hian Parliamentary Speaker, Mohammad Baqer Qalibaf, nuclear inremna kawnga hmalatu Saeed Jalili, Interior Minister hlui Mostafa Pourmohammadi leh Health Minister hlui Masoud Pezeshkian te chu candidate an ni.

<><><>